

Baden-Baden, 29. April 1569

An Theodor Zwinger

UB Basel, Fr. Gr. I 11, fol. 320r-v.

S. Episcopius, quod ad Ciceroniana attinet, mihi satisfecit. Specimen Demosthenicum (quando is libellus scholis potiss[imum] destinatur) vtcunque placet. Verùm spero in integro opere fore attentiorem. Oporiniani responso me nullo dignantur. Quorum siue superbiam siue incuriam aequiore animo feram, si fidem seruarint, hoc est, si et Isocratica ad nondinas proximè futuras absoluerint, et pro singulis ternionibus singulos florinos Francofordiae procuratori meo cum 12 exemplis dederint: qua conditione te cum ijs etiam esse pactum scribis: in qua et ipse acquiesco, quando illa opera penè pro derelictis habui propter impedimenta illa et controuersias sociales. Verum Episcopius pro integro Demosthene liberalius mecum agat necesse erit, quando id opus, vti mea fert opinio, et magnificum futurum est, et eius officinam ornabit, et immensis plurimum annorum laboribus mihi constituit. Qui si denuo mihi capiendi essent, nihil suaue meritu, vt ille ait, esset. Nunc, quando post longam nauigationem terra apparet, mediocri nauo contentus ero, eoqüe tali, ὥστε μὴ πλεονεκτεῖν, ἀλλὰ πλεονεκτεῖσθαι δοκεῖν. Peto autem pro singulis duernionibus graecolatinis florinos singulos, et exempla 20. Et quia editionis alea incerta est, et valetudo mea multò incertior: in mandatis dabo procuratori meo, vt graecolatinum opus à me emendatum, cum annotationibus et gnomologijs graecolatinis, Episcopio tradat, non nisi 50 f. acceptis: reliqua pro numero foliorum vnà cum 20 exemplis, absoluto opere, vel mihi, si vixero, vel haeredibus meis mittenda erunt. Ad specimen quod attinet, de vetere pactione muto nihil, in singulos terniones singulis f. cum 12 exemplis contentus: modò mature, saltem vnum integrum exemplum habeam. Haec te illi significare velim: vt si ei hae conditiones displicerint, mature agam cum alijs. Est enim et ipse aut cessator, aut obliuiosus, nec ad omnia literarum mearum capita respondet, εἰρωνεύμενος ἔνια τῶν ἐμοὶ διαφερόντων, οὐκ ἡττον δὲ καὶ ἔσωτῷ: cuiusmodi est (vt vnum proferam) negligentia in comparandis epistolis Aeschinis et Demosthenis graecis: quibus non mihi est opus, sed ipsi: modò hos autores integros edere velit. Turpe certè quidem futurum est, eas epistolas latinè legi, quae graecè non adsint, cum hae iudicent, atque indicent, vtriusque oratoris rempublicam et ingenium. Sed haec hactenus. De legato carini, quòd scribis mihi 50 f. εἰς μνημόσυνον destinatos, gratum est, futurum multò gratius, si promissa apparuerint: cuius rei spem habeo perexiguam. Nisi enim haeredes illius, viri boni et liberales fuerint, atque etiam docti, aut à doctis admoniti, facile optimi et doctissimi senis vltimam voluntatem reddent irritam. Quod ne fiat, si bona cum gratia, et sine grauiore molestia tua impetrari potuerit, rogo, vt beneficium inchoatum absoluas. Sin multis ambagibus fuerit opus, incerto praesertim euentu: et te molestia, et me destinato munere carere, facile patior: eoqüe facilius, quò saepius ostentata commoda tributa mihi non fuerunt: Habeo Martem, dissipatorem pecuniae, in secunda domo thematis natalicij, quam Graeci ἐπαναφορὰν vocant, Arabes pecuniae assignant. Venus tamen in ἐπικαταφορᾷ non negat haereditates per se: sed negat ratione familiae. Cognatos enim orbos habeo nullos, et caeteri amici, si suis quam alieno sua donare malunt, id neque mirandum est, neque vituperandum, neque iniquo mihi ferendum animo. Et quidem mei reditus, quamuis exigui, abundè mihi sufficient, nisi et pietas et ciuilis honestas plura me conferre in alios cogerent, quam in me ipsum. Sed quid ego nugis meis occupationes tuas interpollo? Summa esto haec: Si quid obtinueris, gratum est futurum. Sin minus: benefica tua voluntas ampliss[imi] et legati muneric instar prope est futura. Vale. Badae Marchioniae, vbi nummos Episcopij per

alembicum (vt Chymici vocant) distillo. 29 Aprilis. 1569. Haec cum scripsissem obiter audiui, Vulcanios in Gallias penetrasse: ducem Albanum 400 incendiarios per omnem Germaniam dimisisse. In Wirtebergensi quidem ducatu agricolas pluribus in locis excubias agere vidi. Cum autem Augusta discederem (quod die abhinc octauo factum est) constans rumor erat, comitia ibi futura. Sed denuo nugari caepi. Quare ignoscet.

Hiero[nymus] Wolfius  
Tuus.